



SIARAN MEDIA

1,000 PUSAT MEMBELI-BELAH BAKAL DILENGKAPI FASILITI KITAR SEMULA, LONJAK EKONOMI KITARAN NEGARA

PUTRAJAYA, 10 Jun 2026 - Keputusan Jemaah Menteri untuk melaksanakan penyediaan Fasiliti Pengitaran Semula (FPS) di pusat membeli-belah di seluruh negara membuktikan komitmen Kerajaan MADANI dalam memperkukuh pengurusan sisa pepejal serta peralihan negara ke arah ekonomi kitaran yang lebih mampan, selaras dengan teras Malaysia MADANI.

Menteri Perumahan dan Kerajaan Tempatan, YB Tuan Nga Kor Ming hari ini berkata keputusan Jemaah Menteri pada 5 Jun lalu, mencerminkan komitmen kerajaan dalam melaksanakan reformasi pengurusan sisa yang lebih progresif, mampan dan berimpak tinggi.

“Kerajaan tidak melihat sisa sebagai sekadar beban, malah suatu sumber yang mempunyai nilai ekonomi. Justeru, langkah mewajibkan fasiliti kitar semula di pusat membeli-belah sebagai syarat lesen perniagaan dapat memudahkan urusan rakyat dan memperkasakan kemampanan pembangunan negara.

“Matlamat KPKT adalah untuk menjadikan kitar semula semudah membeli-belah, dengan kewujudan lebih 1,000 pusat membeli-belah di seluruh negara menjelang akhir tahun ini, pengguna serta peniaga di premis pusat membeli belah dapat mengasing dan menghantar bahan kitar semula dengan dekat dan mudah,” kata beliau.

Tambahnya, inisiatif ini tidak hanya membantu mengurangkan sisa ke tapak pelupusan, malah menyokong pembangunan ekonomi kitaran serta membudayakan amalan kitar semula dalam kalangan rakyat.

Bagi memastikan pelaksanaan yang berkesan dan mampan, inisiatif ini akan dilaksanakan secara berperingkat melalui empat fasa utama bermula Jun 2026.

Fasa pertama memberi fokus kepada kelulusan kerajaan, penyediaan garis panduan, sesi libat urus serta program kesedaran awam, di samping menggalakkan penglibatan sukarela pengusaha pusat membeli-belah tanpa sebarang penalti.

Fasa kedua yang berlangsung dari Januari hingga Jun 2027 melibatkan pelaksanaan projek rintis di beberapa PBT terpilih serta pindaan Undang-undang Kecil (UUK) bagi menguji mekanisme pelaksanaan, menilai keperluan infrastruktur dan tahap kesiapsiagaan pusat membeli-belah serta penerimaan pengguna sebelum diperluaskan ke seluruh negara.

Seterusnya, fasa ketiga dari Julai hingga Disember 2027 akan memberi tumpuan kepada penguatkuasaan mandatori secara bersasar melibatkan permohonan lesen baharu dan pusat membeli-belah sedia ada di lokasi terpilih.

Berdasarkan dapatan projek rintis, penyediaan FPS akan diperkenalkan secara berperingkat melalui syarat pelesenan dan garis panduan yang ditetapkan oleh PBT bagi memastikan pematuhan yang tinggi serta pelaksanaan yang teratur.

Fasa terakhir bermula Januari 2028 akan melibatkan penguatkuasaan penuh dan pemantauan berterusan dengan pematuhan mandatori sepenuhnya terhadap semua pusat membeli-belah baharu dan sedia ada di seluruh negara.

Cadangan ini juga akan dibentangkan kepada Majlis Negara Kerajaan Tempatan (MNKT) bagi memastikan penyelarasan menyeluruh di peringkat kerajaan negeri dan PBT, selain menyokong pelaksanaan EPR, memperkukuh pengurusan sisa pepejal bandar, meningkatkan prestasi kemampanan bandar di bawah MURNInets serta mewujudkan peluang ekonomi melalui aktiviti kitar semula dan program *trash to cash*.

#MalaysiaMADANI

#Kesejahteraan

#StrongerTogether

#DemiPertivi

#UnityInDiversity

#RacakkanMADANI

Kementerian Perumahan dan Kerajaan Tempatan (KPKT) terdiri daripada lapan Jabatan/agensi Kerajaan iaitu 1. Jabatan Bomba dan Penyelamat Malaysia, 2. Jabatan Perumahan Negara, 3. Jabatan Kerajaan Tempatan, 4. Jabatan Pengurusan Sisa Pepejal Negara, 5. PLANMalaysia, 6. Jabatan Lanskap Negara, 7. Tribunal Perumahan dan Pengurusan Strata dan 8. Institut Latihan Perumahan dan Kerajaan Tempatan. Agensi lain di bawah KPKT ialah Solid Waste Corporation Malaysia (SWCorp), Urbanice Malaysia, Syarikat Perumahan Negara Berhad (SPNB) dan Perbadanan PR1MA Malaysia (PR1MA).

Dikeluarkan Oleh : Unit Komunikasi Korporat
b.p. Ketua Setiausaha
Kementerian Perumahan dan Kerajaan Tempatan
Telefon : 03-8891 5555 | Faks : 03-8891 5557 | E-mel : media.ukk@kpkt.gov.my

